

محمد فارس أبو عمار

حُكْمُ السِّتِّ

أشعار عامية

طبعة أولى ٢٠١٨

بطاقة الكتاب

عنوان المؤلف : حُكم السيِّت
المؤلف : محمد فارس أبو عمار
التصنيف : أشعار بالعامية
رقم الإيداع : 5197 - 2018
عدد الصفحات : 100 صفحة
رقم الإصدار الداخلي : 147
تاريخ الإصدار الداخلي : فبراير 2018 طبعة أولى
تصميم الغلاف والتنسيق : دار النيل والفرات للنشر والتوزيع

جميع حقوق الطبع والنشر محفوظة للشاعر، ولا يحق لأى دار نشر طبع ونشر وتوزيع الكتاب إلا بموافقة كتابية وموثقة من الشاعر

دار النيل والفرات للنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018
هاتف: 01011256943 - 01116202218 - 01202541192 تليفاكس: 020554372901

المنشور الرئيسي: ج.م.ع. محافظة الشرقية - العاشر من رمضان - مجاورة 13 - امام سنتر الد3 - عقار 304

الإهداء

- إلى والدى رحمه الله رحمة واسعة
- إلى والدتى حفظها الله وقد كتبت لها كلمات متواضعة
- إلى زوجتى التى قدمت لى ولأبنائى كل العون والجهد
- إلى أبنائى : شيماء ومحمود وإسراء
- ولأحفادى : مصطفى ومحمود
- وإلى أستاذى ابن عمى وأخى / عبدالحميد فارس رحمه الله
الشاعر العملاق عضو / جماعة رابطة الأدب الحديث
- وصاحب ديوان وجدان شاعر وهو أول من فتح لى طريق
كتابة الشعر وشجعتى عليه
- واليهم أهدى الإصدار الأول لى
- وأخيرا أتوجه بالشكر إلى الأخت الشاعرة / منى الغريب
التي تعاونت معي في تنسيق وإخراج هذا الديوان
- الشاعر / محمد فارس أبو عمار

ذنبه إيه

يامحسوب ع البني آدمين

فين الرحمة و فين الدين

ألف قاف .. ألف قاف

نص الكلمة من حرفين

لو ح تفكر مرة تقولها

حتمًا تبقى شريك القاتل

تبقى كمان ع القتل معين

واوعى تقول ده باسم الدين

يامحسوب ع البني آدمين

....

طب ذنبه إيه .. وعملك إيه

طفل يعيش محروم ويقيم

أمه هناك ف رحاب مولاها

ذنبه إيه في اليتيم ضناها

تقتل ليه ؟ ولصالح مين؟

يامحسوب ع البني آدمين

....

لَمَّا الرحمه تموت مع قلبك

راح تلاقيها ف قلب بهيم

تقتل تشرب دم اخواتك

شاب يروح و ف عز شابه

تحرم أهله ليه بغيابه

طب مش يمكن هو عائلهم

ولا وراه أولاد بيعولهم

ليه تقتلهم باسم الدين

يامحسوب ع البني آدمين

....

أيها دين بيقولك تقتل

تحصد ناس أرواحها بريئة

اللي بيحرس أرض بلاده

واللي بيسعى لأكل ولاده
واللي يقيم الفرض عباده
ده اللي ادالك الفتوى غشيم
قال لك تقتل باسم الدين
يامحسوب ع البنى ادمين

....

ياللي بتظلم ياللي بتقتل
أيّ زمان أو أيّ مكان
طب فين أخلاقك يا إنسان
إحذر ذنبك وغضب ربك
لما يحاسبك يوم الدين
يامحسوب ع البنى أدمين

.....

عريس لقطة

كنت ح اجهز أوضة نوم



محمد فارس أبو عمار

قُولت كفاية علينا سرير
 هو يادوب على قد نومتنا
 لازمته إيه بس التبذير
 يعنى عشان اكمنى مدبر
 قال بيقولوا عليا بخيل
 بلا صالونات وستارة حرير
 ماله كليم وإياس لحصير
 والطبليه أحسن من غيرها
 هي السفرة ومنها المكتب
 ربّت ياما زمان مشاهير
 يعنى عشان أكمنى مدبر
 قال بيقولوا عليا بخيل
 والتلاجه مافيش داعى منها
 لأ.. بيقولوا ضررها كثير
 ماله الشرب من الحنفية
 فى المستقبل اجيب القله

وان فرجت راح اجيب الزير

يعنى عشان اكمنى مدبر

قال بيقولوا عليا بخيل

وايه يخلينى اروح الشركه

نشرب ميه ..مع التعكير

أنا راح أدق طرمبة ف بيتنا

تجيب لى المية شديدة نقيه

تبقى ثواب واهو منها سبيل

وأحسن من دفع الفواتير

يعنى عشان اكمنى مدبر

قال بيقولوا عليا بخيل

هو ضرورى نجيب بوتاجاز

ونشيل ليه همّ الأنابيب

على سهرايه ووابور جاز

ولمبه فتيل هاتنور بيتنا

وطشت غسيل موروث عن امى

كات وارثاه عن جدة ابوها
نلقى غسيلنا فل جميل
يعنى عشان اكمنى مدبر
قال بيقولوا عليا بخيل
لا وتقابل نايبة كبيرة
شبكة ومهر ذهب م الغالي
وحاجات تانيه ماجات على بالي
ماله ياخلق الذهب الصينى
ليه نطلع على طول في العالى
والمصاريف أولى بها عيالى
لو جه عيل ولا اتنين
ولسّه ياهو مشوارنا طويل
يعنى عشان اكمنى مدبر
قال يقولوا عليا بخيل
لو كام لمبة على باب بيتنا
للي قُرَيْب واللي البعيد

كام زغروته هاتملا حارتنا
بلاها كهارب ولّا دي جي
والمعازيم تتغدى ف بيتهم
أكل الليل ع المده تقيل
يعني عشان مانا قلبي عليكوا
تقوموا تقولوا عليا بخيل

....

سى روميو

سي روميو تحت البلكونة
لجل الشغاله تحنّ عليه
من ورا سيدها تجرى تقوله
واقف هنا بتنيل ايه
مستني انا منك نظراية

أو حتى تخنيلي بلقمة
أو تديني ذكرى بيجامة قديمة
وكان يلبسها البيه
دا انا اللي باستناكي ليلاتي
ترمي لي نظرة كمان يا حياتي
من غيرك الدنيا دي مره
ما يحليها كريم شانتية
= طب يلا بقى يجيلك دهوه
لا البيه يطب لنا على سهوه
يطردنا انا وانت لبره
يبقى عملت بحبك ايه
*وماتبقيش كده قاسية عليا
وبخيله قوي بالحنية
= يابنى روح شوفلك شغله
وبدل مابتستنى اللقمة
من واحدة زي شقيانه

مهدودة ف شغلي وتعبانه
انا مهما كان واحده وليه
والشقى خد منى راقات
سابق لي فيها وتستهبل
وعلى جوازنا بتستعجل
طب حيلتك ايه يامنيل
ياخويا روح اكل نفسك
بدل ماترمي عليا بلاك
ياتشوفلك شغله وتسترجل
ياتوريني لعرض قفاك
*عايزاني اقول ولا اخبي
الشغل ده انسي ياخبي
كفايه انا اخلف منك
وانتي بقى اصرفي ع البيت
=آخر زمن دا الرجاله
عايزين كده يعيشوا عواله

يلا بقى ارحل وفارقني
ولا تعالى ابقى قابلى
امبارح الساعة ثلاثين

....

آخر صيحة

بحب الموضة
ياروحي ع الموضة
اموت انا والبس موضة
ادينى الجينز المتقطع
وعليه الكاجول برموده
قطع يامقطع لبسني
الجينز ده هوّ الى عاجبنى
والموضه كمان بتشيكنى

فتحتها بتبين جسمي
شباب كثير جريوا ورايا
وكم ان كثير عينهم مني
ومن بعيد شاب ندهلي
قال لي تعالى يابسكوته
قولت صحيح يبقى عجبته
مد ايديه و مسك ايدي
من غير كلام قولت موافقة
على انه خلاص راح يخطبني
قالي ح ناخذ حاجه ساقعة
ونروح البيت عندي شوية
وفرضت معاه حسن نيه
أتاريه كان ناوي على نيّة
واللى ف ايده كانت خمرة
فضلت أرقع انا بالصوت
اتلمت الناس حواليا

قالولوا يابني مالك بيها
 قال دى مراتي غاليه عليا
 عشان زعلانه مني شويه
 ح اخدها البيت لجل اصالحها
 قولت دا كذاب ابن لذيّنا
 لاعمرى شوفته ولاعرفته
 شافوا بطاقتى وبطاقتة
 طلع نصاب 100 المية
 جات الشرطه وقبضوا عليه
 طلع مسجّل حراميه
 شافوا لبسي وتفوا عليه
 قالوا تستاهلى ياغبيه
 الحقنى يابا انا كنت ح اضيع
 وفضل ربي اللي عصمني
 لاعدت افكر في الموضه
 دى الحشمه مافيش أحسن منها

ورجعت تانى استرنفسى
ولاحد ف مره يشوف جسمى

.....

يا أميره

كلامك بيزيد أشواقي
وسكاتك بيسيبيني ف حيرة
لوهمسك محسوب بالكلمة
انا ناوى ادفع لك بنديرة
آه منك آه يا أميرة

....

ياجميلة وياحسن بهائي
لغرامي كان إيه وداكي
وقعتي قلبي في هواكي
وجورتى على حق الجيره
آه منك آه يا أميرة

....

الليل ف عينيكي بقى نهار
خليتي قلبي بينهار
فى هواكي وبقيت محتار
ودلاك ماتقولش سفيرة
آه منك آه يا أميرة

.....

أميرة وجمال جذاب
لو شاورت تلقى الخطّاب
ولا ألفين واقفين ع الباب
اللي بيطمع له ف نظرة عين
واللى بيطلب له التأشيرة
آه منك آه يا أميرة

....

الجنة في بعاذك نار
جرّيتي دموعي لأنهار

لو ينفع هاعملك زار
وادبحلك جملين ف الشبكه
خليهم عربون تصبيرة
آه منك آه يا أميرة

....

كلمة راح اقولها وبصراحة
دي النظرة ف عينك دبّاحه
انا قلبي خلاص طب ف حبك
ولا ينفع أعمله جراحة
ولاينفع أربطله جبيرة
آه منك آه يا أميرة

....

ح اعملك محضر وقضية
اكنك عفواً حرامية
وسرقتي قلبي وعينية
وح اروح بالدعوة على سويسرا

وف كل محافل دولية
وح اقول ف الدعوة بصراحة
السرقه برقة وحنّية
والمسروق مني ده كان قلبي
ويبقى التعويض ليا أميرة
م الحب ويلغوا التسعيرة
آه منك آه يا أميرة

....

إنت مين

يعنى ليه مكتوب علينا
يوم عزا ويومين حداد
وقبل ماينتهوا
كاس المرار ينعاد
وكل يوم يروح عدد
بعديه كمان أعداد
ياشارب من دم البشر
فيه بينا لقا وميعاد
خلعت توب البشر
ماعدتش خلاص انسان
الشرب بيك انتشر
ولبست لبس شيطان
ارحم تكالى حزانى
واطفال صغار أيتام
أهالى ولادنا اتلثموا

بالأسى والسواد
لو كنت صاحب دين
روح شوف عدوك فين
أنا مصري ايوه مصري
ممکن اعرف إنت مين؟!
....

حُكْم السِّتِّ

الست صحيح اللي بتحكم

والراجل قاعد مسكين
ماعليه غير يصرف أوياكل
وان قال يا شمال بتقوله يمين
ده لأن الكلمة اهي كلمتها
ماهي ليل نهار ويّا جارتها
وتبقى ليلته ماهيش فايته
إن قال عايز آكل ياولية
كل ساعه شخطه وناطره
وتقول على همك مش قادرة
نفسى ارتاح منك حبه
وعاملي زي غراب البين
قاعد ف البيت زي الكبّه
لا في فايده منك ولا عايدة
لا مساعد في شغل الشقة
ولامرّه حتى غسيل مواعين
ياناكرة كل خير مني

عائش معاكى غضب عنى
قاسيه وعمرك ما تحنّى
جايبة الغدر ده كله منين
بكره تشوفى قيمة راجلك
وتعيشى فى الدنيا لوحداك
لما الندم يوجع قلبك
ولا هايفيدك دمع العين

...

رسالة شهيد

من ابناء الصعيد

جايلك أنا ياماي

بتوب منقوش على نعشى

أمانه عليكِ يأمّاي
لا تحزني وتبكي
لمي اخواتي وابوي
واقعدي اتعشي
انا كما النعسان
طلقة غدر يأمّاي
سكنت هنا ف صدري
معقول يا خلق الله
مصري يقتل اخوه مصري
فى التو يأمّاي شالوني
عشان ما قدرتش انا امشي
اطمّني يأمّاي
ما شعرت بألم واصل
ولا رمشت انا برمشي
وسط خلق كتير زفوني
لاتقولي ولد ملك ولا أمير

ده غير سندس وحرير وكسُوني

الوصف كيف اوصفه يامَّاي

دا الوصف خلاني

اقول ياريتني أعيش

وارجع شهيد تاني

أمانة عليكي يامَّاي

ادِّي عفشي وجهازي لاخويا

وقولي له مايز علشي

وقولي لعروستي كمان

ان جالك عريس زين

طوالي وافقي عليه ومشِّي

عشان طلبوني خلق كثيرم السما

انا قولت حاضر وما اتأخرشي

امَّاي انا فرحان

قابلوني خلق كثير تانيين

بالورد والرياحين

والنياشين رقوني
وقالولي ان هونت على أهل الأرض
على أهل السما ماتهنوشي
كيف تجود بروحك وعمرك
واهل السما عليك ماتجودشي
أنا موتي بحكم القدر
ودمي ماراح هدر
والعيبة ع اللي غدر
هو اللي حظه شين
رسالتي ليكي ياماي
يقرولك اللي فيها
أم الشهيد تتهنى
والقاتل امه نعزيها

....

رنة تليفون

جاتني رنة من بئينه

دقة قلبي اتلخبطت

صوته عالي م اللي جرى لي

قلت له اسكت ساكت

التليفون صحى المدام

قولت يانهار مش فايت

روحت اتدارى في الدولاب

كأني بادور ع الجاكيت
جات ورايا تجري الهائم
واحد واحد اتسحبت
شخبطت فيا شخطة قوية
كل مفاصلي اتلّيشت
عملت نفسي ماشي نايم
أخذت تليفوني واتصّنت
والست بثينة هات ياكلام
تسألني خلاص اتطلقت
ارمي عليها تلت طلقات
علشان تبقى اتأدبت
زعقت فيا يا محروس
تعرف عليا واحد ست
أبدا ياروحي دي واحدة راجل
وأنا غلطت أما رديت
مسكت ليا المنفضة

على روعي قوام اتشهدت
وهي قالت فين يوجعك
غصب عني ياحياتي
دي واحدة عليا اتصلنت
قالت كفن جدي اللي متشاله
مايغلاش على جتتك
فزعت ف بثينه وصوتت
اقرى الفاتحة ع المرحوم
بعد أما يصحى من النوم
عشان حياته كده انتهت
أيوه حياته كده انتهت

جواز اضطرارى

متجوز الولية
وبناتها عليها هدية
يمسك إيد داهية
ويطبطب على دية
قال يعني دي حنية
وهما بحسن نيه
عيب دول زي بناتك
ويمكن من دوراخوانك
ما تغفلش الولية
آمنتك على بناتها

ووثقت في كلامك
قالت تخاف عليهم
اكنك زى ابوهم
اتاريك تغلب خاين
عايز تغرر بيهم
قايم بالليل تتسحب
على غرفة البنات
بدل ما تحميهم
رايح تبص عليهم
قال يعني بتغطيهم
وعينيك مليانة شرار
والفعل فعل شيطان
قالت جوازه تحميهم
من كلام الناس
وما عرفتش اللى فيها
إنك واحد بصباص

واحسن من ضل حيطه

زي مافى الأمثال

أتاري الحيطه أرحم

من زي ده الهلاس

عشان مافيهش فايده

واحسن منه المداس

وعمر الديابة ماتبقى

على الغنم حراس

....

ابقى قابلنى

ياللى رفضت الخوخ ترضى به

جالك يوم تتمنى شرابه

واللي بيرفض خير على بابه

يبقى الذل يا ناس أولى به

اشرب مرك واسكت عيش

أحسن بكرة ماتلقى العيش

بعد ماكنت تعيش متهني

كنت فاكرها الدنيا ح تحلى

صبحت روبه وزى الوحلة

بكره تقول ولا يومك ياللي

كنا معاك بالمش نحلي

ناس بتموت مش لاقيه القوت

وخلق ياناس بالتخمة تولي

لوفاكريوم كان عدّى يعود
ابقى تعالى ياخويا قابلني
بس اسمحلي اقولك فكره
برضو اليوم أحسن من بُكرة
بيضيع الخير ويّا الأيام
زيّ الخيط واتكر ف بكرة

....

في الحرم المكي

محمد فارس أبو عمار

متجمعين في الحرم المكي

صحبه ويّا رسول الله

يشفع لنا في الآخرة نبينا

ف الجنة ندعي نكون ويّا

كل أماننا ننهي أجالنا

نعمل صالح يرضي الله

وصحبه ويّا رسول الله

....

نبقى صحبه ويّا نبينا

و لا يوم ينفع مال ولا جاه

في الآخرة هاتجنى عمل الدنيا

واللي ها يعمل خير يلاقاه

واللي يقدم شئ راح يلقى

عمله قصاده بيستناه

وصحبه ويّا رسول الله

....

ياللي الدنيا واخدها مطية
وحياتك ماشية نمطية
اللي يقولك صلي وزكي
تقوله انا طيب حسن النية
تعمل إيه النيّة الحسنة
لو ماتأدى فرض الله
ونبقى صحبة ف طاعة الله

....

ياما ناس قالوا بكره نصلي
ونداوم ع الطاعة تملي
ومين يضمن من عمره الثانية
لما سنين يوعد ولايوفي
بالذنب يروح وها ياخده معاه
ياريته كان على طاعة الله
عشان يشفع له رسول الله

زواج مثليين

يعني ضاقت بيك الدنيا

تقولي زواج المثليين !

دا الحيوان مايفكر فيها
ولاحتى أفعال شياطين
إنت راجل ولاحرمة
ولأ مخنس بين لاتنين
احذر غضب الرب يامجرم
لما المثل يعاشر مثله
نبقى نقول ع الدنيا سلام
طبيعة الكون ربنا نظمها
تيجى انت بجهل تغيرها
السما راح تهتز بجرمك
لولا الرحمة لزال الكون

مش عزة بابا

ياللى بتسعى ف بلدي فساد
ولأ بتضرب..... الاقتصاد
ضربة تشل إيديك الاتنين

تصبح عبره للعباد
إياك تأخذ شيئاً مش حقك
لوخردله ح يحاسبك ربك
لوكنت فاكرها ياخويا وسية
ماهياش عزبة أبوك ولا عمك
كفكك أصله مالوهش جيوب
وعملك كله مشين وعيوب
أصل الدنيا دي مش دايمة لك
قبل الآخرة لابد تتوب

....

فى سيدنا الحسين

باعشق ترايك
ونسمة هواكي
وروحى تفارقني
لو ابعد بعيد

ياخذني حنيني
لخان الخليلي
وسيدنا الحسين
والسهرة هاتحلى
ف مقامك ياطاهرة
واحشنا الحكاوي
وشاي "الفيشاوي"
وطعمه ف لساني
ها يفضل سنين
وكان من حلاوته
بنطلب دورين
لو احنا تعبنا
من كتر طوفنا
نعود لحبيبنا
لجنب المقام
نكبر نصلي ..فيه ركعتين

الأرض المباركة

ومهد النبوة

يا مصر يا قاهره

لكل العدا

ربى ذكرها

واللى دعا لها

جد الحسين

فاكر يافندى

شيخ نقشبندى

صوته يجلجل قبل الآدان

نسمع له مره

ومره طوبار

ولو كنت غاوي

تسمع غناوي

كلام "الفاجومي"

والشيخ إمام

وكالة يا "غوري"

تحاكي تاريخنا

العريق من زمان

علم وثقافة

وحضاره وأمان

....

جوّه القلب

الذكرى الثلاثين لوالدي " رحمه الله "

رحمة ربي وألفين رحمة

رحمة ربي عليك

زى ماربنا وصّى بأمرى

برضو وصّى عليك

ياما شقيت وتعبت عشاننا

ما ف مره تعبت و كَلَّيت

جوّه القلب مكانك دايمًا
مهما ان روحت هناك أو جيت
كنت قَرِيب من ربك دايمًا
في حياتك صومت وصليت
ياما عطفّت ع المساكين..
فى السر وخبيت
أيها مال فى إيدك أو جيبك
أبدًا عمره ما بيكون ليك
قاري و حافظ لكتاب ربك
على نهجه اتوفيت
"ال عمران" أية التوحيد
فضلت تقول وتعيد
غبت بوعيك بره الدنيا
وللشهادة.... مانسيت
رحمة ربى عليك ياوالدى
رحمة ربى عليك

مترین شاش

والله الدنيا مادايمة لحد

مهما ها تكبرولا ها تعلّى

مسيرك يوم تتحط ف لحد

إحسن عملك

حطه ف كفنك

يومها ماحد بينفع حد

أعبد ربك واخلص عملك

قبل ما باب التوبه يتسد

أو عمي غرورك ياخذك منك

تبقى يا عيني روحك بلاش
دا الانسان بالكلمه الحلوه
يحيا كريماً طول ما ان عاش
لو يتعالى قوله تعالى
إعرف نفسك وماتنساش
إنت ف أصلك ميه وطن
أخرك قطنه ومترين شاش
هوه الطين دا بيبقى له قيمه
ان زل ياناس ينداس بمداس
لكن الطيبه تعلّى صاحبها
وبالأخلاق ينشال ع الراس

....

العصفوره

كان فيه عصفوره صغيره

تتنط وتتلعب بالكورة

تاكل حبه .. تنط النطه

علشان عصفوره صغيره

...

عصفوره بتصحى الفجريه

وصحيت على صوتها الصبحيه

وكتير بتطير وتغنى لنا

علشان عصفوره صغيره

...

بتسبح للرب كريم

علمها من غير تعليم
خالقها وناشيها
ما بين الخلاق
ولا يوم ناسيها
من الرزق رازق
علشان عصفوره صغيوره

....

لما كانت اللحمه رخيصة

إياك وأن تأكل لحمه
و لبطن سيادتك تستحلى
المئة جنيهه ف كيلو واحد
لايكفى غدوه ولا عشوه
إياك وأن تأكل لحمه

....

مالها البصارة والبول
دى حتى سعرها معقول
العشره بحق كيلو واحد
وأحسن ميت مره من اللحمه
اياك وأن تأكل لحمه

....

طب ماله النابت بالدقه

بالخل والتوم ع الفته
ومراتى بتعملها بدقه
والريحه بتملالى الشقه
والطعم ألد من اللحمه
إياك وأن تأكل لحمه

....

عيالك ان جم طلبوها
أو مروا بجزاروشافوها
أو بالصدفة ف يوم عرفوها
أو عند جيرانك شموها
قل يابنى اللحمه مالىها لازمه
إياك وأن تأكل لحمه

....

بالفول الصويا أهو غشوها
حتى الحمير ما عتقوها
أخذوها على غره وذبجوها

ومنها كباب أو نيفه
والكفتة ع الفحم شووها
والناس تأكلها بشرأهه
لاتبالي أمراض ولاعدوى
إيالك وأن تأكل لحمه

....

على فرض صحيح إنها لحمه
ضاني وبتلو ماهيش بغله
راح تبقى ثقبيله على المعده
وتجيب النقرس والتخمه
إياك وأن تأكل لحمه

....

وليه أعيش العيشه البشاواتى
وأنا راجل على قد حلاتى
والجاي مش قد الريحات
وأكفى منين أنا ياخواتى

ومنين راح أجيب حق اللحمه
مابلاها ياناس ناكل لحمه

....

ولا أقدر از عليك

بحبك وأعشقك

ولا أقدر أزعلك
ولومره زعلت منى
أنابرضو مش ملك
ما اقدرش أزعلك

....

تغيب عنى وتتقل
وأدور عليك وأسأل
مأنت الوحيد يا حبي
اللى لقلبى امتلك
ما أقدرشى أزعلك

....

إنت بس اللي ليّا
لكن يصعب عليا
منك كتر الأسيه
ولما ترضى عنى
ف لحظه بتلاقينى

ف يمينك ملك لك

ما اقدر شي از عليك

....

شهر الرحمة

يا شهر الرحمة اشتقتنا لك

اشتقنا اشتقنا اشتقنا لك

بتغيب وتعود بالخير لينا

ماأحلى صيامك وقيامك

كل أما تعود الخيربيزيد

لجل الغفران نستنالك

ياشهرالرحمه اشتقناك

....

بتملى الدنيا بأنوارك

وسعادة الناس من أسرارك

ياريت على طول تبقى معانا

وتحل علينا ببركاتك

فرحت كبارنا وصغارنا

وعبيرم الجنه بنسماتك

ياشهرالرحمه اشتقنا لك

....

صلاه وصيام .. قرآن وقيام

ذكروتسبيح موسم طاعه

أفراح وعزايم متبادلله

وصلاة التراويح في جماعه

وولاد فرحاته هناك وهنا

وصيام ويانا ساعه بساعه

وياشهرالرحمه فرحنا بك

واشتقنا لك اشتقنا لك

....

بشروملاك

ف الأصل بشر

والطبع ملاك

والشكل قمر

وازاي أنساك

مشتاق للسمر

والقعدة معاك
لو قلبك حجر
ح اتمنى رضاك
أنا قلبي انفطر
وما حب سواك
أه لو تفكر
زمان وياك
ياما كنت انتظر
ضله ف سماك
لوتحت المطر
سنه ها استناك
دا العمر سفر
ولا أرضي سواك
إن كان ده قدر
أنا كلي فداك

....

رَبِّ الْعِبَاد

زَيِّ مَاقَالَ رَبِّ الْعِبَاد
اصْلَحُوا وَبَلَّاشِ فُسَاد
تَزْرَعُ خَيْرَ بَكْرِهِ تَلَاقِيهِ
وَيُورِثُوهَ بَعْدَكَ أَحْفَاد
تَعِيشُ حَيَاتَكَ تَسْعُدُ بِهِ
وَيَبْقَى فِ الْآخِرَةِ لَكَ زَاد
زَيِّ مَاقَالَ رَبِّ الْعِبَاد

....

إياك تغدر .. إوعاك تظلم

واحذرتاكل حق الناس

إوعاك تاخذك مره الدنيا

ويغرك وسواس خناس

عملك مكتوب وتملي عليك

ف سجلك ليوم الميعاد

زيّ ما قال رب العباد

....

حاسب نفسك وبلاش غيرك

واعلم انه رقيب معبود

ارضى ربك وارضى ضميرك

ح تبقى وسط الناس محمود

وكل شئ مكتوب بميعاد

زيّ ما قال رب العباد

....

مهما هاتتعب ولا ها تسعى
رزقك ده بمقدار محدود
أصل الرزق ما هوش بشطاره
ونصيبك جاهز موجود
اقنع تتهنى بحياتك
وتعيش في غاية الإسعاد
زيّ ما قال رب العباد

....

صاحبى

صاحبى يا خراط معادن

عايزك تصنعلى قلب

مخروط على اسطمبه

معمول بدقه وفن

مايكونش فيه غلطه

شغله يكون ع الرايق

لاغش فيه ولا أونطه

والخامه تكون م الصلب

متأثرش فيه بئطه

ولا صدمه لحام كهربا

ولا طرق ع السندان

ولا لسعة لسان حاده

ويكون وريد صادق

يتحمل قساوة ناس

كتير بتظلم بعض

ملحك وعيش ياكلوه

لاحفظوا ولاصانوه

ان اشتريتهم غالى

بالرخيص يبيعوك

تسعد ف يوم فرحهم

يتفننوا يبيكوك

لوقدت ايدك شمع

مايوم تكون عاجب

لناس ماتعرف حق

ولا تحفظ الواجب

لو كل الناس كده

ماتأخذش م البشر صاحب

غلطان ياللي تقول

أصل العين عمرها

ما تعالى على الحاجب

....

قهوه زياده

قهوه ومنور فنجانها
غريبة الطعم وألوانها
لو الدنيا تخلف مواعيدها
بتجيني القهوه في أوانها
السادة سكرها زياده
بالاقيها دايمًا كالعادة
م الإيد اللي بتطرح سكر
مضبوطه ولا أعلى إجاده
اتعودت عليكى يا قهوة
اكنك معموله بفن
لو عدّى يوم جاني بسهوة
يتشت عقلي ويجن
لو أفكر يوم ما شربها شى

يرجع قلبي يلين ويحنّ
صباح القهوة بسكرزاد
خلاني أتعلق بيها
بتخليني أنسى الزاد
بس قوليلي السر فيها
وجبتها من أيها حاوى
ولا السحر اللي حاويها
أكيد إيدك ساحراها
وطلاسمها انت تحليها
وتحليها

....

أنا أمكم

أنا شمسكم أنا ضلُّكم

أنا أمكم

شمس الدفا ف يوم بردكم

شجرة حنان بضلُّها

يوم حركم

كل ما اقرب ليه تبعدوني

من غير سبب كده بتبيعوني

إيه اللي غير طبعكم أنا أمكم

....

ربي تكوا وف عز التعب

ما هونتوش عليا

والقلب كان بيضمكم

ورموش عينيا

ياما كنت انوح بالالام

من بلوتي

ولا كنت أبوح بالكلام
ولا شكوتى
والنظره ف عيونكم
حبابى تهون عليا
ايه اللي غير طبعكم ده انا أمكم

....

شبابى راح وعمرى ضاع
من أجلكم
ولا شوفت يوم فرحت بيه
في قربكم
كان نفسى في حبة حنان
اوحتى كلمه طيبه
طالت الحياه أوقصرت
مالدنيا فانيه قريبه
وها تعرفوا قيمة أمكم
ايه اللي غير طبعكم أنا امكم

....

شوفتوا الوحوش

إزاي تحوش عن أمها

من أيّ شئ

لو جت أذيه تمسّها

يفدوا بحياتهم أيّ شئ هايضرها

ومين ياناس حط الحنان في قلبها

وانتوا مين اللي يقسي قلبكم

ايه اللي غير طبعكم على امكم

....

وانا وسطكم كتبتوا ليه

شهادة الوفاه

بتموتوني وانا لسه

على قيد الحياه

ياريت ابوكم لما مات

خدنى معاه

ولا شوفت قسوة قلبكم
ولا اللي غير طبعكم على أمكم

....

ليهم رب

ودّع في أهله وعارف
انه خلاص مش راجع تانى
باس ف ولاده واحد واحد

بس ساعتها سلامه بكاني
لمعه ف عينه فوقها الحسره
أمانه يابا إياك تنساني
دولا ولادي أمانه ف إيدك
لسه صغار محتاجه حنانى
لومكتوب لى يابويا شهاده
حتما ربي يكون زكاني
أيها مؤمن مخلص وطني
أكيد يتمنى يكون ف مكاني
جنة و حور و ملايكة ربي
من دلوقتي بتستتاني
روح ياوليدى وكون مطمئن
ان الرحمن مش ح يسيبنا
أنا وولادك راح يوهبنا
وانت اطمئن يا حبيب قلبى
كلنا يابنى ليهم أب

ربك هو اللى بيحميهم
أهلك شايئينهم فى عنيتهم
وانت اتوكل على مولاك
روح دى الجنة بتستناك
واحنا رضينا خلاص بنصينا
أيوه رضينا بحكم الرب

.....

نصيحة أب

اسمعى يابنتى
وانت مقبله
على بيت جوازك
ولبيتنا مدبره

أنا عارف انك

شاطرہ مدبرہ
واجہی ببساطہ
أى مشكله
وان حصل خلاف
ماتقوليش لحد
وان حبوكى عشره
عكسهم الاف
يبقى الحل بينكم
بالحب والإتلاف
حماتك زى ماما
وحماكي زى أب
تكسبي رضاهم
بالوداد والحب
واللي مايسأل عنك
اسألي عليه
تملكي عريسك

ويحطك ف عينيه
وتكوني طايعة لجوزك
مادام في طاعة الله
عشان طاعته واجبه
من بعد الإله

....

وانت ياواخذ مني
زينة الحياة
أوصيك تعاملها
بما يرضي الله
زي ماقالوا اسيادنا
يكرمهم كريم
ويظلمهم لنيم
وأنا عارف انك
جد ومستقيم
إسراء أمانه يا احمد

حطها ف عينيك

تحافظ عليها

تسعدھا وترضيها

تحطك ف عينيها

وتحافظ عليك

من أيّ نسمة طيره

وتبقى لكم ذريه

صالحه في طاعة الله

وعلى بركة الله

....

إلى ست الحبايب

لجلك اخضرت الدنيا

وليكي غنى الربيع

مستحيل استغنى عنك

وكأني طفل رضيع

لوجابولي كنوز الدنيا

بيكي انت مش هابيع

الكنوز ف يوم بتفنى

وحبك انتي محال يضيع

ولو زعلتي ف لحظه منى

يبقى من غيرك أضيع
ده برضاكي الدنيا تحلى
ويبتسم الروض البديع
وبدعاكي ياملاكي
من الأهوال حجاب منيع
تسلمي لنا وتعيشي لنا
يبقى العمر علينا ربيع

....

يا مصطفى

يامصطفى يامصطفى

نورت الدنيا يا أبها

النور يشوفك ينطفئ

يامصطفى

نورت حياتنا كلها

وضحكه مافيش ف زيها

تجرى لتيته تشدها

عايز تبوسها ف خدها

ومين ف الفرحة قدها

لما مصطفى يحبها

تشاوړ لجدو من بعيد
لما يجيب لعب كثير
وقطر كمان سكه حديد
يمشي بحماس.. يضرب نفير
يطير م الفرحة مصطفى
يا مصطفى
تورته وشموع في قلبها
صورتك جميله ف وسطها
وزينات كثير متعلقه
عازم صحابك كلهم
فرحوا بميلادك السعيد
غنوا وقالوا مصطفى
يعيش ويكبر مصطفى
يا مصطفى

لجنة الإمتحان

فى لجنة الإمتحان

شكا الكراس م القلم

واللى ماسكينه

كلامكم اللى اكتب

انتو غاشينه

ضميركو ان كان عاش

ولا فى الإنعاش

ولا على باب اللجنه سايبينه

زى قتيل اتقتل

بايده وسكاكينه

بكره الفساد ان زاد

يبقى انتوا اللى زارعينه

مين باواد علمك

الغش والإختلاس
وبكره ازاي تكون
مسؤل تقود الناس
يعنى نواة مرتشى
وعمرك ما تختشى
ولا عندك ف يوم إحساس
قولي مين غشك
وباع لك الامتحان
هو ابوك علمك
ولا صاحبت شيطان
ازاي تكون مسؤل
بالغش والتدليس
واول فساد زرعك
بالغش في الكرايس
لو الامتحان اتباع
ومجهود زمايلك ضاع

ح يقاسي كثير الوطن
منكم وم الأوضاع
ليه تكون غشاش
جاهل كده بخيبه
و يشتروك ببلاش
بجهل مش طيبه
لو الوطن اتسرق
يبقى انتوا اللي سارقينه
ولو تفرط فيه
يبقى انتوا اللي بايعينه
خربت ياناس الزمم
ماعدش فيها أمان
معايا يالا قولوا
ع الدنيا ألف سلا

خدوا المعاش

خدوا المعاش وأكلوني
أنا والوليه والبنتين
عشان معاشي تخیلوا
بقى تسعمايه الا ثلاثين
نصهم فى الميه ونور
وباقى الشهر ناكل بالدين
وبعدها حنسد منين
خدوا المعاش
بعد المعاش انا صحتى راحت
لا تتفع فى صنعه ولا تاجرہ
أنا لو شايف شئ يناسب لى
كنت أنزل له من بكره
ولا كنت أكل أنا بالدين
ولا اذل نفسى بكلمتين
بسبب المعاش

قالوا فى المعاش ترتاح
أتاري الهم زاد قلبى
مراتي اهي زعلت مني
ورايحة تطفش وتسبيني
طلبات بيتي منين اجيبها
حياتى اتلقبت بسببها
أجيبها شمال واجيبها يمين
حد ياناس يجي يحسبها
وياخد المعاش
خدوا المعاش أنا نفسي أعيش
زى بقيت الخلق ماعايشه
ليه تخلصونا نمد الإيد
يعنى حكومه خلاص مش شايفه
الاعدام اهون يا اخونا
من معيشة الذل البائسة
بسبب المعاش

خدوا المعاش وريحوني
بدل ما أروح واتعب واقتبضهم
شافني واحد سواق توك تك
باعدهم واحسب واكتبهم
مد ايديه قال يسندني
اكنى داىخ وما أقعشى
قولت صحيح الدنيا بخير
وبصراحه أنا قلبى أكلنى
قام راح ف غفلة ولهفهم
وجري بالمعاش
بعد المعاش أنا ناوي أطفش
واسيب لكوا الدنيا وامشي
بس بلاش حد يقولي
ان بايدي خراب عشي
طب ما العش انتوا خربتوه
والمعاش انتوا قصفتوه

حتخلوني ارقع بالصوت

ولاياناس أطم وشي

لولا حرام الطم وشي

بسبب المعالاش

.....

أنصح فلاح

(مفتتح)

فلاحنا دا أنصح فلاح

و حَداَم الخير إن غدا أو راح

محمد فارس أبو عمار

ده مره صحي في الصبحيه
قام جت له فكره انما هيّه
ولا عمرها ما تخرّ الميّه
قال ايدى ف ايدك يا وليه
و نقبّ على وشّ الدنيا
امشي ورايا وهاوديني
واياكي ف مره تعارضيني

....

أنصح فلاح

بيعى الكردان يا وليه
والقيراطين اللي حيليتنا
يالا بنا على بنك القرية
ويبقى دقيقتنا فوق زيتنا

وهاتيجي الدنيا على هوانا
نبقى أنا وانتى حاجة تانية
نعمل إذاعة قروية
ونسَمَّع الناس إذاعتنا
فشر القنوات الدولية
ونطَلِّق الفقر بإيدنا
وان لعب الحظ شوية
ننزل على مصرأم الدنيا
وأي حاجة نجيب منها
بسعر العملة العالمية
وان اتزنقنا احنا ف قرشين
النقد هايدينا السلفه
بضمان سمعتنا الوردية
وصيتنا تسمع به الدنيا
وشيخ البلد يجي حدانا
والعمدة هانحطه ف جيبنا

ونصرف كيماوى بالتقسيط
ونغلي الأسعار على كيفنا
واللي مايدفع قسط عليه
نحجز عليه وناخذ أرضه
واجيب كارتته موديل حديث
تحلف بها كل العزبه
وع الهويس ادق طرمبه
وآخذ م الناس حق الميّه
والهوا ييجي في الخطه
وع المناخير نصرف عداد
يعد الأنفاس بالشّمّه
وح اعمل ترعه دور تاني
والميه تطلع في العالي
و اخذ م العمده العموديه
والطبالين يشرحوا حالي
هما أدرى الناس بيا

وعينيا طبعا هاراضيه
وانتوا بقى الخطه الجايه
وان زهقتوا اوي تموتوا
وصبروا روحوا شويه
وان موتوا بقلبي احيكم
والكفن مني هديه
أنا سامع حد بيسألني
امتى بقى الخطه الجايه
أسرع م البرق هاتيحي
سنة ألفين وستمايه
وابقى قابلنى إنت وهى

....

شوية حظ

إدينى شوية حظ
وأنا اقول للدنيا دي طز
علشان دايم ملعونه
وبتتعب ف اللي جابونا
وساعات بتكون مجنونه
ولا شوفناش منها العز
إدينى شوية حظ

بتروح دايمًا لاصحابها

وبتدي للي عاجبها

دايمًا بتعلي الواطي

عايزانا ليها نطاطي

وأنا معرفش التطبيل

ولابرقص لها بصاجات

ولايعرف وسطي الهز

إديني شوية حظ

عارفين هي بصراحه

ماتخلي حد ف راحه

سكاكينها دي الدباحه

بتلاقي حد ف ورطه

ف رقبتة تدوس وتجرّ

ومادام طبعها ويانا

الغدر مع الخيانه

من حقى أقول لها طز

ولا عايز منها العز

....

الشاعر في سطور

الاسم/ محمد محمود عبدالعال فارس

الشهرة/ محمد فارس أبوعمار

مواليد/ 1954 فى حى بولاق القاهرة

من عائلات فارس ببني عدى

المؤهل/معهد اعداد الدعاة

عضو / رابطة الزجالين وكتاب الأغاني

عضو/نادى أدب السلام القاهرة

عضو/نادى أدب القلب قلوب

عضو/جمعية أصدقاء سيد درويش للتراث

عضو/مؤسس نقابة العاملين بمجال الشعر(تحت التأسيس)

محرر بمجلة اشراقة سابقا

محاضر ومحكم فى بعض المسابقات فى مؤسسة بنت الحجاز

ناشر فى مجلة عبير الزهور

ناشر فى مجلة إشراقة

ناشر فى مجلة نقابة العاملين بمجال الشعر (تحت التأسيس)

قدمت نص غنائى (أطفال) للذاعة وافقت عليه اللجنة
لبرامج الأطفال

شاركت فى ديوان نبض الشعراء بالنقابة سابق ذكرها

حاصل على المركز الثالث فى الشعر من النقابة

حاصل على شهادات التقدير والجوائز من المشاركات
بالصالونات الأدبية والندوات الشهرية

الفهرس

م	القصيدة	الصفحة
1	بطاقة الكتاب	2
2	الإهداء	3
3	ذنبه إيه	4
4	عريس لقطة	7
5	سي روميو	11
6	آخر صيحة	14
7	يا أميرة	17
8	إنت مين	21
9	حكم الست	23
10	رسالة شهيد	25
11	رنة تليفون	29
12	جواز اضطراري	32
13	ابقى قابلني	35
14	في الحرم المكي	37
15	زواج مثليين	40
16	مش عزبة بابا	41
17	في سيدنا الحسين	42

45	الله يرحمك يابا	18
47	مترين شاش	19
49	العصفورة	20
51	لما كانت اللحمة رخيصة	21
55	ولا أقدر أزعلك	22
57	شهر الرحمة	23
59	بشر وملاك	24
61	رب العباد	25
64	صاحبي	26
67	قهوة زيادة	27
69	أنا أمكم	28
73	ليهم رب	29
75	نصيحة أب	30
79	إلى ست الحبايب	31
81	يامصطفى	32
83	لجنة الإمتحان	33
86	خدوا المعاش	34
90	أنصح فلاح	35
95	شوية حظ	36
97	الشاعر في سطور	37
99	الفهرس	38

